



# Påske

Lukas 22–24, Matteus 26–28, Markus 14–16, Johannes 18–20

## Bakgrunn

Jesus seier om seg sjølv: Eg er vegen sanninga og livet. (Joh 14) I denne samlinga ynskjer me at dette sentrale bibelverset skal få ei forteljing – ei hending – knytt til seg. Vår bøn og målsetjing er at borna oppdagar korleis frelseshistoria heng saman. Dei skal vita kva som skjedde med Jesus, og kvifor det er viktig for oss.

Påskeforteljinga er rik på både handling og detaljar, og ein kan difor rote seg bort og ikkje komme heilt fram til poenget. Vi kan unngå det dersom vi er merksame nok.

I Johannes 14 spør ein av læresveinane Jesus: kvar er vegen? Forteljinga om Jesu liding og død har fleire element av vandring. Jesus kom ridande inn i Jerusalem, han gjekk til Getsemane, vart teken til rådsherrane, gjekk til Golgata, kom gåande i hagen etter oppstoda.

I denne forteljinga ynskjer me å få fram at me går på vegen i lag med Jesus, og at vegen er der Jesus er – også når Jesus går lidingsvegen, gjennom døden og står opp igjen med siger over alt vondt. Livet med Jesus tek til i dåpen, og døypefonten er difor startpunktet i vandringa. Heile vandringa skjer i Guds hus. Det kan vera eit bilete på at heile livsvegen vår, vandringa gjennom livet, er i Herrens hender.

## Materiell

Heile denne samlinga føregår i kyrkjerommet. Å vandre, dvs. gå og reflektere på ein gong, er og eit verktøy som hjelper til med formidlinga. Ta deg ein tur på førehand for å leite fram påskesymbol i kyrkjerommet. Dersom desse kan flyttast, eller stoppestadane kan bytast om, er det aller best for vandringa at det er eit symbol ved kvar stoppestad. Det er tid til undring ved kvar stoppestad.

Musikk, salmar og song høyrer med til ressursane i denne samlinga. Ha med kantor/organist og bruk salmar/songar og musikk de brukar i påskegudstenestene. De veit best sjølv kvar dei passar inn i vandringa.

Tent Påskelys/Kristuslys i golvstake, eller lysglobe plassert mellom 6. og 7. stoppestad. Enkle kostymer til Pilatus, Jesus, Peter og kvinna. Kantor og forteljar kan gjerne ha desse rollene.

1. stoppestad: **Ved kyrkjedøra**
2. stoppestad: **Alterringen**
3. stoppestad: **Første eller andre benkerad på eine sida**
4. stoppestad: **Ved inngangsdøra på same sida**
5. stoppestad: **Ved inngangsdøra på motsett side**
6. stoppestad: **Første eller andre benkerad på same side som døypefonten**
7. stoppestad: **Døypefonten**

Før de går inn i kyrkjerommet:

**Er de klare?....**

Gå innanfor døra:

## **I. stoppestad: Palmesøndag. Ved kyrkjedøra.**

---

Ha dei kvite filt sirklane samanrulla og klare til å rulle ut, slik at dei saman dannar ein trekant. Sei: **"I namnet åt Faderen, Sonen og Den Heilage Ande"** medan du legg handa på kvar av sirklane, og gjentek: **"Skaparen, Frelsaren og Livgjevaren."**

Pause.

Sei: **"Det var eingong ein som sa slike flotte ting, og gjorde slike fantastiske ting at folk berre måtte spørje: Kven er du? Det var Jesus, han som er vegen, sanninga og livet.**

### **Jesu reid inn i Jerusalem:**

No var det høgtid i byen Jerusalem og mange folk var samla. Jesus og læresveinane hans var også på veg til Jerusalem. Jesus hadde mange som følgde han no. Det var mange som ville at Jesus skulle vere kongen deira – ein som kunne frigjere landet deira frå okkupasjonsmakta, romarane. Difor la dei kappene sine på vegen og ropte "hurra for Kongen" då Jesus reid inn i Jerusalem på ein eselfole.

Jesus var konge, men ikkje på den måten folk hadde tenkt seg.

**Eg undrar meg på kva konge Jesus er?**

Gå til 2. Stoppestad, gjerne med sang.

## 2. stoppestad: Innstiftinga av nattverden. Alterringen.

---

Det gjekk ikkje lenge før læresveinane lærte kva det ville seia at Jesus var ein annleis konge: Jesus hadde bede læresveinane sine om å lage til påskemåltid til kvelden, og som skikken var skulle alle vaske føtene før dei åt. Det var som regel tenarar som vaska føtene til gjestene, og det var ikkje ein populær jobb. No tek Jesus til å vaske føtene til læresveinane! (Joh 13:1-17) Peter protesterte, men Jesus forklarte at den som er stor i Guds rike, er den som gjer tenester for andre.

Ha klar ein stol, vaskevannsfat, mugge og handkle og vask føtene til dei borna som vil.

Då alle var klare, heldt dei måltid. Jesus sette, brødet og vinen på bordet, ba takkebøna og sa: Dette er min kropp og mitt blod som eg gjev i dykkar stad. Gjer dette til minne om meg.

Judas var ein av læresveinane. Jesus sine fiendar hadde betalt han for å vise dei kor Jesus var. Dei hadde lokka Judas med pengar for å finne Jesus og ta han.

**Eg undrar på om Judas hadde det godt den kvelden?**

Gå til 3. stoppestad.



## 3. stoppestad: Getsemane. Første eller andre benkerad på eine sida.

---

Etter måltidet gjekk Jesus, saman med læresveinane, til Getsemanehagen. Jesus ba læresveinane vera med å be om at han ikkje måtte bli freista, men dei sovna i staden. Jesus var redd for å døye (Luk 22:44) og ba så godt han kunne: "Gud, far, lat viljen din skje!"

Plutseleg sto Judas der, saman med ein heil flokk soldatar og leiarar i byen. Dei hadde våpen og tok Jesus med makt som om han var ein forbrytar. Jesus gjorde ikkje motstand, men vart med dei og sa: " Dette er dykkar sjanse, no er det mørket som rår" (Luk 22:53)

**Eg undrar på om det var nokon som hjalp Jesus?**

Gå til 4. stoppestad.

#### 4. stoppestad: Pilatus og dommen. Ved inngangsdøra på same sida.

---

Fiendane til Jesus ville at Jesus skulle dømmast til døden. Dei ville få han vekk. Men det var ikkje så enkelt. Kva var det eigentleg Jesus hadde gjort gale?

**Drama:** Pilatus: Er du kongen over jødane?

Jesus: Mitt rike er ikkje av denne verda.

Pilatus: Så er du då konge?

Jesus: Eg er konge og eg skal fortelja om sanninga.

Pilatus kunne ikkje sjå at Jesus var farleg eller hadde gjort noko gale, men jødane sa at han måtte dømmast til døden fordi han sa han var Guds Son. (Joh 19:7)

Slik vart Jesus dømd til å døy på ein kross. Soldatane piska han, laga tornekrone til han og spytta på han.

**Eg undrar på om Jesus ville ta igjen når dei var stygge med han?**

Gå til 5. stoppestad

#### 5. stoppestad: Peter som fornekta Jesus.

Ved inngangsdøra på motsett side.

---

Peter hadde fylgd med på avstand då dei tok Jesus til fange. Han kom seg heilt fram til rettsalen der Jesus skulle dømmast. Plutseleg var det nokon som kjende Peter att:

**Drama:** Kvinne: Er du og ein av læresveinane til denne mannen?

Peter: Nei, det er eg ikkje.

Kvinne: Jo, du snakkar same dialekten som han.

Peter: Eg kjenner han ikkje!

Kvinne: Å, jo da! Me såg deg i hagen då Jesus vart teken til fange!

Peter: Nei! Du tek feil! Eg forstår ikkje kva du snakkar om!

Då Jesus og læresveinane hadde måltidet tidlegare om kvelden, hadde Peter sagt til Jesus: "Eg skal aldri svikta deg, eg er klar til å døy for deg." Då sa Jesus til han: "Peter, før hanen gjel i natt kjem du til å nekta tre gonger for at du kjenner meg". No var det nett det som hadde hendt.

Peter forsto og var svært lei seg.

**Eg undrar på kvifor Peter vart så redd?**

**Eg undrar på kva Jesus tenkte om Peter?**

Gå til 6. stoppestad



## 6. stoppestad: Golgata.

### Første benkerad på same side som døypefonten.

---

Jesus vart dømd til å hengjast på ein kross og døy der. Krossen måtte berast til staden der det skulle skje, til Golgata. To andre menn skulle også krossfestast den dagen. Då dei tre mennene hang der på kvar sin kross, og venta på at dei skulle dø, sa den eine til Jesus: Dersom du er konge, frels oss alle tre! Men den andre sa: "Vent litt! Du og eg fortener dommen vi har fått. Jesus har ikkje gjort noko galt." Så såg han på Jesus og sa: "Hugs meg når du kjem til ditt rike" Då sa Jesus til han: Veit du kva? I dag skal du vera med meg i Paradis!"

Ei stund seinare, rett før Jesus trekte pusten for siste gong, ropa han høgt: "Far, i dine hender gjev eg mi ånd!" Så døde han, og sjølv om det var midt på dagen vart det heilt mørkt ute.

Blås ut Kristus-lyset.

Då Jesus var død, fekk to av venene hans lov å ta kroppen ned av krossen. Dei salva den med god lukt, og tok eit kvitt klede rundt den. Så la dei kroppen til Jesus i ei grav i ein hage like ved. Grava var laga i fjellet, med ein stor stein framføre inngangen.

**Eg undrar på kvifor Jesus måtte døy når han ikkje hadde gjort noko galt?  
Eg undrar på om Jesus hadde det vondt på krossen?**

Gå til 7. stoppestad.

## 7. stoppestad: Oppstoda. Ved døypefonten.

---

Tidleg søndag morgon, kom Maria Magdalena til Jesus si grav. Der såg ho at steinen var velta vekk. Ho gjekk inn i grava og møtte to englar. Den eine engelen sa: "Ver ikkje redd! Jesus er ikkje her, han er stått opp frå dei døde. Han lever! Gå og fortel læresveinane og Peter kva som har hendt!"

Då ho kom ut or grava, kom Jesus gåande mot henne, men ho kjende han ikkje att. Ho trudde det var gartnaren. "Maria" sa Jesus, då snudde ho seg og sa "Meister!" Ho visste at det var Jesus.

Tenn Krisus-lyset.

### STORT ER TRUA SITT MYSTERIUM

**Eg undrar på kven som rulla vekk steinen?  
Eg undrar på kvifor Jesus vart levande att?**